

# Weh Wi Ga Fi Seh

Wi don paas migl a  
di yaa: How tingz?

## Free Op Wiself

Aagas fos da-mi **Imansipayshan Day**. Sohn a di memba dehn a di Di Nashanal Kriol Kongsl mi deh da di Baptis Choch di nait bifo. Di Baptis Choch weh deh da di en a Kween Schreet eena Bileez Siti mi ga wahn Imansipayshan Day servis fahn 10:30 tu midnait di nait bifo di Imansipayshan Day serimoni da Govament Hows—wel, tudeh day, dat nayhn Hows a Kolcha, pahn Reejent Schreet eena Bileez Siti. Pahn tap, di Baptis Choch di hoas wahn groep fahn Bloofeelz, Nikaragwa (Bluefields, Nicaragua). Wi big op **Miz Hazel Wilson** ahn **Paasta Eli Simeon** fahn Bloofeelz, ahn di res a di Bloofeelz groep! Ahn Paasta Stanford ahn adaz da di Baptis Choch, plos dehn ada vizita dehn tu Bileez weh kohn vizit fi Imansipayshan Day—in fak, da laik wahn week a aktiviti ahn fongshan di Baptis Choch di gat. Nof rispek! May Faada Gaad bles wi konchri ahn pipl, ahn aal di vizitaz tu Bileez---ahn wi brejren ahn sischren dehn fahn Bloofeelz, Karn Ailan, ahn adarels plays lang di Atlantik Koas a Nikaragwa! Dehn taak Kriol jos laik wee...nayli laik wee! Memba seh Spanish da di ofishal langwij a Nikaragwa, sohn yu maita hyaa sohn lee Spanish langwij er song jrap eena fi dehn Kriol.

Pahn tap, wi big op NICH and ICA (Institute for Creative Arts) ahn aal hoo mek Imansipayshan Day hapn eena dis ofishal way ahn da **Yaabra Green** eena Eebo Tong ayrya! Da wahn big difrans wen govament help mek dis day hapm—noh jos dat da wahn haliday, bot dat dehn mi ga big serimoni da Hows a Kolcha fi maak di day, Aagas 1, 1838. Now, tudeh day, laik wi doz aalwayz seh, mek wi taak now seeryos seeyros-wan bowt iekonomik imansipayshan fahn ya goh bak. Bileez jain now lat a di ada konchri dehn weh di aana Aagas 1 as Imansipayshan Day. Now... mek wi imansipayt wiself fahn mental slayvri. Oanli wee, wiself, ku free op wi main (chranslayshan a weh Bob Marley sing: *“Emancipate yourself from mental slavery. None but ourselves can free up our minds.”* – Bob Marley.)

-----

Silvaana Udz, Ed.D da fahn Bileez. If yu waahn tel shee bowt sohnting speshal fu put eena dis Kriol aatiki, eemayl: [sudz142@gmail.com](mailto:sudz142@gmail.com) **Vizit: [www.nationalkriolcouncil.org](http://www.nationalkriolcouncil.org)**